

# Tgi dastga discurrer quant ditg?

I dat debattas monstrusas, ma era fatschentas senza discussiun

■ **(anr/vi) Il pled «parlament» ha il medem origin sco il pled rumantsch «baterlar». Quai na vul betg dir che mintga parlamentari dastgia far baterlims infinits. Tgi che dastga discurrer en il cussegl naziunal è prescrit en in reglament.** I dat tschintg categorias da fatschenta. La categoria I sa numna la «debatta libra». Tar lezza dastgan da principi tuts commembers dal cussegl naziunal prender il pled. Mintgin po discurrer tschintg minutas. Ils pledaders da cumissiuin dastgan schizunt discurrer ventg minutas.

En la categoria I datti sulet fatschentas da gronda muntada, per exempel iniziativa u dumondas brisantas e popularas. Talas fatschentas chaschunan debattas monstrusas, nua che gia la discussiun d'entrada cuzza pliras uras. Ina fatschenta da la categoria I n'è betg tractandada per Flem.

## Mes'ura per mintga fracziun

En la categoria II è il temp da discurrer li-

mità. Mintga fracziun obtegna per exempel ina mes'ura. Quella mes'ura po la fracziun reparter sin singuls commembers che vulan s'exprimer en chaussa, quels dastgan lura discurrer tschintg minutas.

Ils pledaders da la cumissiuin han pe-da ventg minutas per declarar ina fatschenta da la categoria II. L'emna proxima vegn tractà a Flem il «fond d'infrastructura» en la categoria II.

## Mo paucs dastgan dir insatge

Quest'emna sa fatschenta il cussegl naziunal trais dis cun la legislaziun da la gulivaziun da finanzas. Igl è ina fatschenta da la categoria III – ina «debatta reducida».

Discurrer dastgan: Ils pledaders da cumissiuin (ventg minutas) ed ils pledaders da fracziun (tschintg minutas). Sch'in parlamentari fa ina proposta da minoritad, dastga el explitgar ses arguments durant maximal tschintg minutas. Perquai ch'ils parlamentararis grischuns

n'èn betg en la cumissiuin che tracta la gulivaziun da finanzas, na vegnan els quest'emna gnanca en pled.

## Decider senza «parlahar»

La categoria IV sa numna «debatta curta». Qua discurren be ils pledaders da cumissiuin. Sch'insatgi fa ina proposta da minoritad, sto el u ella dar giu ses arguments en scrit e na vegn betg en pled. Savens vegnan postulats u rapports tractads en questa categoria.

En la categoria V na discorra nagin pli. Era il pledader da cumissiuin dat giu ses rapport en scrit. Sulet sch'el sto anc responder ad ina proposta da minoritad, va il pledader anc al pult d'orateurs ed explitgescha la posiziun da la cumissiuin.

Per la sessiun a Flem èn tractandadas 16 fatschentas en la categoria IV e V. Quai èn pli bleras fatschentas ch'èn la categoria II e III. Il parlament decida pia pli savens sias fatschentas tut a la mitta e senza «parlahar».



Bler vegn decidì a la mitta senza «parlahar».